

# SANTO NATALE 2022

## (i ricordi di un nonno)

Vegné chi fiolett, che ve cunti 'na storia  
Som vegett, l'è vera, ma gô bona memoria  
De quela not ch'el me pa 'l m'ha tra giô del lett per dim  
De 'ndà de corsa in la gregia a scernì foera on berin  
De portà fin a Betlem in d'ona stala  
Piena de fregg che a riscaldala  
Gh'era giust on boeu inséma a on asnin  
E pogià giô in la gregia on pôr Bambin.  
L'è 'ndada inscì che quand som 'riváa  
Tegnendo in brascia 'l berin e per man el me pa  
L'ho propi vedú quel caro Bambin in brascia la sua mama  
Coi i ogitt sarà su ch'el faseva la nana.  
Ma quand gô varzà su el me bel berin  
L'ha dervì i sô ogitt e l'ha slongá la manina  
A fag 'na carezza a la mia bestiolina  
Ma, intant, ghe spontava di oecc du gotoni: 'l piangeva!  
E mi som restà fina mal, perché prima el sorideva...  
Ma questa l'è on'altra storia c'ho tegnù ben a ment  
Ona storia de toeu 'l fiáa, ma per fav content  
Quand vegnarà Pasqua ve la contaro su  
Perché quel' Agnelin inciodà su la Cruz:  
l'era propi Lu!"

*Don Arnaldo*

